

72
11.

DISSERTATIO PHYSIOLOGICO-MEDICA
I N A U G U R A L I S,
D E
OECONOMIA FOETUS NATURALI.

Q U O D
SUMMO ANNUENTE NUMINE,

Ex Auctoritate MAGNIFICI RECTORIS

FRIDERICI BERNARDI ALBINI,

A. L. M. PHIL, ET MED. DOCTORIS ANATOMES ET CHIRURGIAE
IN ACAD. LUGD. BAT. PROFESSORIS ORDINARIJ.

N E C N O N

Amplissimi SENATUS ACADEMICI *Consensu*, &

Nobilissimæ FACULTATIS MEDICÆ *Decreto*,

PRO GRADU DOCTORATUS,

Summisque in MEDICINA Honoribus & Privilegiis
rite ac legitime consequendis,

Eruditorum examini submittit

ALBERTUS HENRICUS ENGELBERT VAN BANCHEM,

ROTTERODAMO BATAVUS.

Ad diem 7. Martii MDCCLXVI. Hora Decima.



LUGDUNI BATAVORUM,
Apud HENRICUM MOSTERT, 1766.

V I R I S

N O B I L I S S I M I S

D. SIMONI ENGELBERT
VAN BANCHEM,

MERCATORI ROTTERODAMI VIGILAN-
TISSIMO: COHORTIS CIVIUM SI-
GNIFERO, FRATRI GERMANO,
OMNI PIETATIS OFFICIO
ÆTATEM COLENDO.

D. CORNELIO VAN DIEST,

AVUNCULO PER AFFINITATEM MIHI
JUNCTO, MAGNO HONORE ET OB-
SERVANTIA SUMMA SEMPER
PROSEQUENDO.

NEC NON

VIR O

NOBILISSIMO SPECTATISSIMO

D. CORNELIO VAN HOEY,

MEDICINÆ DOCTORI EXPERTISSIMO,

HAGÆ COMITUM POLIATRO DIGNIS-

SIMO, NEC NON SENATORI IBI-

BEM GRAVISSIMO, COGNATO

PLURIMUM ÆSTIMANDO.

SACRUM.



DISSERTATIO PHYSIOLOGICO-MEDICA


INAUGURALIS,

DE

OECONOMIA FOETUS
NATURALI.



§. I.



foetus humanus, dum utero materno
continetur, animalis instar vivipari,
ovo inclusi, singularem vitæ oecono-
miam colere solet. Quæ, attente
parum generaliter spectata, sic con-
stituta esse videtur, ut in *communem*
& *propriam* scite dispesci queat. Prior
matrem inter & foetum obtinet, qui
posteriorem, statâ naturæ lege, veluti privam agit.
Universa utriusque ratio, quæ mirifico modo consen-
tit,

A

tit,

tit, in peculiari functionum, tam animi, quam corporis, regimine versatur. Quod si cum eo infantis nati hominisque adultioris comparetur, ingens omnino & multiplex discrimen ostendit. Idque non solum in actionibus animalibus, sed vitalibus quoque, naturalibusque sic dictis, clare elucet. Cunctæ hæ, qualescumque sunt, cum bene vigent, *oeconomiam foetus naturalem*, vel sanam, constituunt. Hæc, prima humanæ perfectioris pars, ad corporis tenerrimi usus quam mirabiliter comparata esse, observatur. Veram ejus formam distinctamque adumbrare, in specimine hoc studiorum meorum inaugurali, conatus sum. Quod dum Eruditorum examini subjicio, ad summos in Arte medica honores consequendos, etiam rogo atque etiam, ut immaturum fortasse hunc ingenii juvenilis foetum benevole accipere dignentur.

§. I I.

Sanam vitæ Oeconomiam, quam considerare jam aggredior, foetus esse humani, liquet (§. I.). Qui ergo, quid proprie sit, ut rite cognoscatur, continuo indagandum est. Equidem ex iis, quæ Veteres nobis tradunt, distincta ejus, de qua hic agitur, notio non constat. Neque, quod sciam, a Recentioribus, quorum solertiam ceterum in accuratiori Naturæ peruestigatione merito laudes, promi solet. Foetus, generali plerumque nomine, a conceptionis principio, ubi tantillum hominis primordium existit, ad maturum usque partum, appellatur. Vel idem etiam, sensu minus lato & ambiguo, ex quo parvulus utero matris suæ adhærescat, vocari passim legitur. Ante quem
me-

memorabilem temporis articulum, junior inde ab origine sua *Embryo* vulgo nuncupatur. Perfectior autem eo adultiorque, *foetus est, cujus corpus quantulumcumque eo usque formatum sit, ut integrum omnino ad infantilis futuri habitum accedat.* Is, conspicuæ magnitudinis,

- 1°. Omnes, quas homo, ætate provectior, partes habet externas;
- 2°. Internas quoque, atque plurimas, fabrica ei respondententes, in communi compage inclusas;
- 3°. Funiculum umbilicalem, a quo pendet, spectabilem, ad placentam exporrectum, qua plene exstructa, & utero adnata, huic alligatus tenetur;
- 4°. Bina involucra, internum alterum amnios, in cujus liquore natat mobilis, alterum externum, chorion puta, inter se arctissime conjuncta sicque figurata, ut ovum referant, capacitate uteri cavo æquale.

§. I I I.

Vitalis oeconomiae contemplatio, quæ sequitur, ad foetum, generatim descriptum (§. II.), proxime consistit. Tenellulus hic foecundo in uteri sinu, quo magis magisque perficiatur, definito quodam tempore residet. Cujus felici progressu, ibi more vivens suo tranquillissime, certam attingit *ætatem*. Ad quam rite metiendam, arbitror, convenit, totam in *primam, mediam & ultimam* partiri. Prima a statu notabili embryonis, ex minimo rudimento, in ovo, recens

foecundato, latente, ad unciae magnitudinem & ultra paullo aucti, procedit. Non determinari exacte potest, quando ætatula isthæc incipiat. Observationes variæ, inter se collatæ, ad credendum modo inducunt, quod plerumque in sextam circiter post conceptionem hebdomadam incidat. Ineunte enim mense tertio, embryonis corpus, integre formatum, expressam elegantissime foetus imaginem gerit. Ætas ejus media inde per insequentes menses, qui gravidæ transigendi sunt, continue excurrit. Ea, quæ princeps est, tum ad incrementum & robur, tum symmetriam partium efficiendam, maxime pertinet. In quibus sane, quam satis nunquam admirari possis, vim Naturæ formatricis inexplicabilem prodit. Ultima noni mensis finem tenet, qua foetus privatam vitæ suæ scenam cum publica commutat. Maturus tunc qui dicitur, ex uteri angustiiis tenebrisque in lætabilem, quam expetat, lucem edi solet.

§. I. V.

Præcipua Oeconomix ratio, quæ foetum nostrum spectat, in corpore ejus organico sita est. Equidem hoc, perinde acsi natum esset, vim vitæ eximiam natura sua actiuosa complectitur. Eaque, qua sanum pollet, res sibi necessarias omnes præclare gerit. Inter quas primum permultæ sunt, quæ ad partium, ex quibus constat, motus automaticos referri possunt. Universales hi in cunctis quin insint solidis, vel firmis simplicioribus, vix fere dubites. Quidni etiam pro earum mollitie ac teneritate, quæ ætatis conditioni respondet (§. III.) singulari modo vigeant? verum in organis
com.

compositis quibuslibet & cum primis in corde arteriosoque systemate quam ramosissimo, emicent. Unde quæ emergit, actio momentosa in humores, qui iis continentur, quaquaversum movendos se diffundit. Ex quo generali principio, præter caloris vitalis originem, multiplicium secretionum excretionumque functiones in foetu assequi utcumque licet. Isque, quod inde pendet, primarium nutritionis opus, quam mirabiliter succedat, felici admodum sui incremento docet. Quadrimestris enim longitudine sua, quæ eam majoris fere digiti æquet, trimestrem jam superare, haud obscure cernitur. Elapso autem mense nono, ceteris paribus, perfectus ulnam dimidiam facile emetiatur. Neque minus velociter idem crescit pondere, quippe quod a paucis tantum granis ad decem & plures sæpe libras augetur.

§. V.

Foetus, naturalis uteri incola, in vitæ statu singulari sibi que proprio versatur. Quem, perstricto breviter generali (§. IV.), speciatim hic concinno ordine prosequi, plurimum attinet. Manifestum oppido est, eum non posse, nisi ex sede & fabrica peculiari corporis, recte exquiri. Sedes hujus, per quam commoda proximaque, in molli, membranaceo, tenui, denso ac pellucido, datur ovo. Quod, semper limpido plenum humore amnios (§. II.), ad cavi uteri figuram & magnitudinem velut fingi solet. Quocirca illud, si ve magis, si ve minus, extensum sit, tantum non quovis in puncto contingit repletque. Satis intus capax est & amplum, ut omni tempore gestationis foetum facile contineat. Qui vero pro ut a prima sui forma-

tione (§. III.), indies magis magisque accrescit, majorem ejus insidet partem, donec maturus ferme occupet integrum. Circumfusus undique leni vivoque humore, pisciculi fere ad instar, mediæ aquæ innat. At non libere tamen, nec sponte sua; quandoquidem a funiculo umbilicali, ad obtusum ovi verticem perducto & attexto firmiter, dependet. Mobilis inde, ut ejus fert longitudo, externum sequitur impulsus, quo leves per undas huc illuc agi se sinat. Ex quo fit, ut suo quasi inerret domicilio, atque, pro varia motus directione, alio alioque in latere recumbat. Ipsum autem ovum ita repositum est, ut, nisi illata vi præternaturali, situm suum mutare haud possit. Namque non solum in arcto hæret uteri complexu; sed innascitur etiam, qua parte extus fundit placentam. Quæ, fundo ejus ampliori plerumque innexa firmissime, ad totum Naturæ apparatus apte retinendum valet.

§. V I.

Anatome foetus humani structuram peculiarem, oeconomiæ ejus artificiosissime accommodatam, in organis partibusque variis demonstrat. Inter quas principes merito reputes, quæ singularem humorum campum, a communi plane diversum, conficiunt. Eæque, primum generalem sub conspectum subjiciendæ, sunt

- 1°. Arteriæ umbilicales;
- 2°. Vasa placentæ & uteri;
- 3°. Vena umbilicalis;
- 4°. Canalis venosus;
- 5°. Foramen cordis ovale;
- 6°. Canalis arteriosus.

Viae hæ fanguinis, quo ordine sequuntur, præ aliis se considerandas nobis offerunt. Videntur ita esse dispositæ, ut in circulum ducant, cuius neque principium, neque finem, ceterum inveniri, constat.

§. V I I.

Vasa, modo summatim recensita (§. VI.), ad universale systema arteriosum venosumque foetus pertinent. Prius nobiliusque, quod vitæ viribus longe præcellit, ramosissima edit Aërta. Quæ, ducta a corde sinistro origine, adscendit paullulum, flectit se brevi arcu sinistrorsum deorsumque, & juxta spinam per thoracem & abdomen decurrit. In cujus inferiori regione, quæ ad lumbos spectat, divisa veluti, vel bipartita, binas dat arterias, quas Iliacas vocant. Quarum altera dextra, sinistra altera, in descensu suo discedunt magis magisque a se invicem, ita ut ad utramque, sibi proximam, pelvis oram demigrent. Quam ubi attingunt, quæque abit in duas, quæ a sede sua Iliacæ externæ & internæ nomen habent. Hæc, socia major, veraque trunci continuatio, Hypogastrica quoque vulgo dicitur. Eaque tum dextra, tum sinistra, non longe ab ortu suo præbent umbilicales. Interdum vero ex hypogastricarum una tantum, vel altera, quæ nata sit, unica observatur. Umbilicales jam ambæ, Iliacis fere æmulæ, intra pelvim ad vesicæ latera se alte demittunt. Ibi sub peritonæo per cellulosam obliquoparum repunt ductu, quo propius sibi mutuo accedant. Dein, imam circa vesicam, sursum modico redeuntes flexu, externos ejus parietes utrimque relegunt. Quibus superatis, continuo extrorsum magis per-

pergunt antrorsumque , ad eminulum hypogastrium proxime emetiendum. Ubi statim supra peritonæum strictiori cellulosa exceptæ ac firmatæ foramen dictum umbilici versus commeant. Quod demum inter perque musculorum abdominalium aponeuroses profectæ , breviori sensim breviorique intervallo comites , una pervadunt.

§. VIII.

Arteriæ umbilicales (§. VII.) simul atque ex foetus abdomine emergunt , funiculum suum ingrediuntur. Qui, chordæ quædam species, ab umbilico, tanquam centro , ad ovum usque (§. V.) pertingit. Anthropogeniæ historia docet, quod, similiter ac foetus, pro ætate, magis minusve provecta (§. III.), longitudine, crassitie ac firmitate vehementer differat. Parum abest, quin, partu perfecto, minorem ulnam adæquet. Ubique etiam, quam longe se exporrigit, medium fere digitum crassus cylindricam prope figuram exscribit. Inæqualis vero idem non solum Spiræ in modum intortus, sed fulcis quoque & eminentiis variis exasperatus esse, deprehenditur. Hinc inter millenos ne duos quidem reperias, qui externa facie sibi prorsus sint similes. Integer funiculus, si recens ex utero eductus conspiciatur, livido plerumque colore resplendet. Membranaceo vestitus involucro est, quod ubi abdomen egreditur, a communibus corporis integumentis, sibi affabre circumjectis, trahit. Atque eo, veluti cortice, quo totus tegitur, inclusam gerit substantiam singularem. Quæ & copiosa, & conferta, cum bene surget, maximam ejus partem efficit. Ambigeres, tactu

tactu explorata, propiusne firmitate ad cartilaginem, an ad ligamentum, accederet. Etenim nec dura, nec mollis, sed media inter utramque, indolem quandam elasticam prodit. Quippe uti se patitur comprimere, vel flecti; ita sibi relicta pristinam recipit formam. Interiori, ex qua constat, fabrica implicatissimam, quam alias cellulofam vocant, fibrarum refert texturam. In fanis hæc, viscidulo perfusa succo, semper madet, eoque pressa leviter digitis adhærescit. Non dubium est, quin, nata inde lubricitate ac mollitie qualicumque, necessariam sibi flexilitatem tenacitatemque servet. Hujusmodi substantia, seu parenchymate, funiculus arterias excipit umbilicales continetque. Quæ, ut geminæ sunt, distinctis eam subeunt locis, & ab uno ad alterum permeant extremum. Apparet, quod ibi in aliis aliisque situ suo adeo ludant, ut magis minusve a se hic illic aberrent. Sæpissime etiam a cursu deflectunt suo, & rectiores brevi ad varios ductæ angulos, funiculi spiras, vel flexus, imitantur. In toto illo itinere nec spargunt ramos, nec confluunt, nisi forte raro. Ceterum perquam commode ac tuto longam, licet instabilem, progrediuntur viam. Namque fibroso, cui insident, funiculi umbilicalis contextu, ceu vinculo colligatæ & suspensæ tenentur.

§. IX.

Postquam arteriæ umbilicales funiculi longitudinem sunt emensæ (§. VIII.); ad ampliorem placentæ sedem perveniunt. Quam ut primum per ovi membranas penetrarunt, proxime consequuntur. Funiculus, ex quo quidem penetrare videntur, opportunis-

B

simum

simum iis aperit transitum. Etenim, ut liquet, in
 egressu umbilici, continuatum integumentis communi-
 bus, induit involucrum. Cujus extimam partem,
 pertenuem, lævem ac densam, ab addita sibi epider-
 mide accipit. Eamque, ut in superficiem ovi incidit
 internam, reflectit undique a se ac dimittit, ad mem-
 branam subtilem amnios conficiendam. Pari modo,
 specie quadam cutis, quam in fine ponat, expansæ
 chorion sensim producit. Quibus membranis, una sic
 exutis, arctoque invicem junctis nexu, admirabili na-
 turæ artificio integrum ovum constituit. Solamque in-
 teriorem, sibi propriam, & cellulosæ quodammodo
 affinem, retinet substantiam. Quæ cum ex fibris, la-
 xius implexis, conflata sit, arteriarum umbilicalium
 excursum reddit facilem. Hæ jam, quo dirigi solent,
 duce funiculo, centrum versus placentæ migrant. Id-
 que vel omnino, vel prope, subtus attingunt. Sim-
 plices quæ sunt toto in decursu, ac disjunctæ, ibi sta-
 tim, truncorum more, in ramos se spargunt notabi-
 les. Qui, vel sursum tendentes, mox imminentem
 intrant placentam, vel ex medio, radiorum instar,
 membranam amnios inter & chorion dimanant. In-
 signes isti per internam ejus faciem tam pulcre trans-
 lucent, ut nudos sub oculos cadant. Primi qui or-
 dine prodeunt pauci magnitudine præsertim eminent.
 Sequentes inde, communi divisionis lege, numerosio-
 res paullo oriuntur minoresque. Latius etiam, pro
 ut spatium increscit, quod percurant, digrediuntur.
 Eique, crebrius divisi subtiliusque plurimos & exiles
 diffundunt ramos, qui ad limbum evadunt. Omnes
 hæ arteriæ, ubi resident, nexæ membranis & conjun-
 ctæ inter se, *stratum vasculosum* repræsentant elegan-
 tissi-

tissimum. Quod ad figuram obtusi verticis ovi, quem tenet, egregie instructum & compositum esse tutissime, liquido patet.

§. X.

Ex strato vasculoso ovi (§. IX.), ut fertili solo, innumerabiles crescunt arteriæ, quæ obductum sibi chorion perreptant. Omnes & singulæ, quam late dispersæ sunt, in proximam se superficiem concavam placentæ immergunt. Quæ, uterina dicta, massa est inæqualis, fere rotunda, mollis, humida, laxa, vel spongiosa, & subrubra. Mirabile observatu, quam diversam, increcendo paullatim, a prima ad ultimam foetus ætatem (§. III.), induat faciem. Quodsi plene formata spectatur, sex plerumque, vel septem, lata uncias, & unam alteramve crassa esse, solet. Ut vero ex medio in ambitum evadit, dimidia fere, quod ad crassitiem, parte decrescit. Quo usque jam extensa obsidet ovum, arterias inde, magno surgentes proventu, nanciscitur. Inter quas majusculæ complures cerni oppido possunt, se in partem ejus inferiorem recta injicere. Incisa placenta, vel inflata, altius & longius progredi latiusque, ita ut quaquaversum distribui videantur. Ubi autem arte anatomica penitus sunt repletæ, conspicuum materiæ immissæ colorem per omnem ferme massam refundere. Quamque eo tantum non ubique percurrere, sole clarius, ni fallor, ostendunt. Præterea, maceratione apta solutæ, quemadmodum percurrant, videre licet. Primæ scilicet, quæ intrent, arteriæ, velut trunculi majores, rectius sursum & introrsum procedunt, adeo

ut ad superficiem placentæ externam contendant. Quo in itinere, distinctæ quasi, utrimque minimis interval-
lis minores minoresque exigunt ramos. Consimiles,
nec minus crebros, emittunt extremæ, quæ ad magnam
demum subtilitatem exeunt. Rami omnes, ubicum-
que sparsi, sensim quoque & numerosiores fundunt
& exiliores, usque dum minutissimi desinant. Cuncti
cum creberrimis sint uniti anastomosibus, systema fa-
ciunt placentæ arteriosum, partemque substantiæ ejus
haud exiguan.

§. XI.

Placenta viscus sui generis est, quod, alterius in-
star, fabrica sua vasculosa tum arterias (§. X.), tum
maxime venas, complectitur. Quæ si anatomice con-
siderentur, a trunco umbilicali, tanquam principio,
recte deduci possunt. Sed spectandæ primum eo or-
dine sunt, quo inde per stratum vasculosum (§. IX.)
porrectæ in placentam transeant. Venæ, quæ ibi
versantur, ramos arboris majores eosque primarios re-
ferunt. Eo se exhibent semper conspectiores; quo
arterias magnitudine & copia magis exsuperant. Ma-
ximæ a trunco, ut centro, ubi explicat se funiculus,
in omnem latitudinem feruntur. Incerto inter & su-
pra arterias oberrant numero, quarum comites, vel
paucae, vel fere nullæ, incedunt. Pleræque omnes
tum serpunt flexuose, tum inæquabiliter ut plurimum
extuberant. Ut vero ab extremo propius absunt
ambitu; crebriores propagant ramos minoresque. Aper-
tum hinc est, quod stratum, vel rete vasculosum, majori
ex parte componant. Myriades sunt, quæ ab ejus
su-

superficie, arteriarum ritu & comitatu frequenti, per chorion ad placentam proficiscuntur. Cui dum imméant, quo veniunt ordine, aliæ propter alias, magnam undique ramorum vim promittunt. Quæ tanta omnino tamque mirabiliter distributa est, ut visu ullo, quantumvis aucto, percipi nequeat. Impletione autem artificiali, per venam facta umbilicalem, quæ proxime patet via, incredibilis fane, quæ arterias longè excedat, multitudo conspicua emergit. Eaque pro ut excrefcit altius, diffusior sensim, densior subtiliorque, reddi solet. Quo circa, intenta acie, vix placentæ invenias particulam, quæ non, una cum arteriis exilioribus, venosis præsertim furculis scateat. Quibus omnibus pertenuis quædam internascitur lanugo, vel materies fibrosa, ad justam corpori ejus & formam & firmitatem conciliandam.

§. XII.

Ea est placentæ natura, ut universa fere, ex vasis, inperscrutabili modo coagmentatis (§. X. — XI.), constet. Quorum originem perpendenti, apparet, arbitrator, liquido, quod ad foetum nostrum jure pertineat. Equidem arteriæ ejus umbilicales sunt, e quibus, velut gemina stirpe (§. IX.), fruticationis quadam specie, viscus illud nascitur. Verum enim cum pars genuina foetus sit; veloci tamen incrementi gradu ad matrem accedit. Nimirum externa, quam porrigit, superficie internæ uteri & applicat se proxime, & accrescit. Non dubitare licet, quin reapse, constanti lege, in statu corporis sano, accrescat semper tamque firmiter, ut haud facile inde secedat. Non raro con-

tingit, ut incisione anatomica gravidæ, recens mortuæ, affixa ibi adhuc integre conspiciatur. Profecto ad maturitatem foetu, primoque edito partu, secundo, nomine secundinarum, cum ovi membranis excluditur. Solvi tunc opportune ex nexu laudato &, levi plerumque negotio, tota detrahi solet. Quibus jam cognitis, quemadmodum momentosa nexus illius ratio comparata sit, merito quæritur. Sedula edocet observatio, ingentem esse mutationem, quam prægnantis uterus subeat. Is nempe, contractus ante, nec grandiori juglande multo major, extendit se gradatim adeo, ut longe ultra pelvim in abdomen antrorsum affurgat. Ad hæc ex figura, piro compresso fere simili, qualis virginei est, in saccum prope ovalem transit, quo ovi magnitudinem pulcre æmuletur. Admirandum insuper in modum substantiam immutat suam. Namque compactus valde & densus, ut extumet magis magisque, crassitie ac laxitate permultum augetur. Neque parum simul a colore naturali degenerat, quem scilicet albicantem in rubrum verti, ostendit. Novus hicce habitus est, quem uterus procul dubio a vasis, quæ possidet, numerosissimis, plurimo distentis sanguine, contrahit. Eumque potissimum, quod notatu dignum, conspectui offert, ubi subditam sibi placentam contingit. Cui crassior longe laxiorque isthac parte sui accommodum quasi locum, ad conjunctionem mutuam ineundam, parare videtur.

§. XII.

Magni fane momenti enarratæ mutationes sunt (§. XII.), quas in secundo graviditatis cursu uterus susti-

sustinet. Qui, si qua placeat fortasse comparatio, subactum cultumque probe arvum imitatur. Etenim duriorum angustiorumque veluti laxat sinum, quo partem foetus, vere vitalem, per se flaccidam, placenta putat, rite excipiat ac firmet. Cum simplici encheyresi tubo inflatur, adtollit se ibi praesertim & insigniter protuberat. Inaequalis etiam eo loci majoribus minoribusque & sulcis, & jugis, varie quasi subaratus esse, deprehenditur. Hisque obversa facie, quae apposita est, placenta pulcherrime convenit. Quae enim, tanquam iniqua excresceret vi, divisa superiori superficie, in tubercula & foveas multiformes abit. Quibus cum uterinis exacte commissis, crebriores nexus & firmiores obtinet. Ad quos proprie efficiendos, primum ex quovis fere corporis sui puncto externo copiosas ac subtiles spargit fibras. Omnesque, tomento tenui subsimiles, membranae, intus uterum vestienti, quam strictissime nectit, vel inserit. Praeter eas, longe tenerrimos minutissimosque effert vasorum ramulos, qui ex ultimis, seu extremis, late efflorescunt. Protracta recens placenta, & attentis examinata oculis, villorum ad instar dissoluti non obscure comparent. Quod si nempe in aqua agitentur leniter, collapsi mox erigunt se, evolvunt & fluitant. Longiores alii, alii breviores ac praerupti esse, videntur. Nullum subest dubium, quin universi agglutinatae sibi uteri substantiae innascantur. Quae, praeterquam quod mollis & rara sit (§. XII.), arteriis venisque multis, ac bene patulis, instructa, optimam innascendi opportunitatem praebet. Venae ejus quamplurimae, subtus decurrentes, inflatu facili sub adspectum veniunt. Animadvertere est, quod multa fatisque magna, quae minimum quandoque digitum admittant, habeant foramina. Arteriae etiam, impul-

impulso aere conspicuæ, serpentino reptare ductu, & extremis suis patere, observantur. Atque mutatae sic, perfubtiles alias, & minimis præditæ osculis, in ea præsertim uteri parte, quæ cum placenta cohæret, insunt. Unde arguere licet, extima ejus vascula, ramosissimaque imis uteri apertis ita immitti, ut invicem coalescant.

§. XIV.

Vasa placentæ & uteri, tam arteriosa, quam venosa, in unum, quod commune dici potest, systema coeunt. Medium hoc inter foetum & matrem, ac utrique conjunctum, singularis structuræ complexu continetur. Universum, habita primæ originis ratione, ex arteriis umbilicalibus existit (§. XII.). Quæ inexplicabili, qua pullulant, lege innumeros crescentes sensim subtilitate ad summam usque ramos diffundunt (§. X.). Perplurimi horum sunt, qui, in toto placentæ contextu, solemni naturæ ritu, venis sese continuant. Quæ ab iis, tanquam sparsis late radiculis, exortæ confluunt paulatim inter se, donec unam umbilicalem, vel truncum, forment. Cujus velut propagines descriptæ (§. XI.), quam inversam sequuntur, directionem semper servant. Exploratissimum est, quod, quomodo enasci ac distribui solent, & omnes inter se, & cum arteriis, communicent. Quæ enim si penitissime repleantur, injectam sibi materiam continuo filo in venas affatim transmittunt. Quin contraria etiam via, nullis quippe præclusa valvulis, eam inde variato experimento appulsam recipiunt. Et, sive una, sive altera, plene perfusæ sint, eandem vasculosissimam placentæ fabri-

fabricam testantur. Non autem solum, quotquot sunt, ejus venas propagare, sed ad eas quoque uteri (§. XIII.) excurrere, videntur. Quidni exilissimæ, ad placentæ superficiem evectæ, parte quadam ramulos illos porrigant tenerrimos, qui ibi prodeunt? Juvat equidem credere, eos vel plures, vel pauciores, singulosve, fortasse foraminulos uteri venis defigi. Hujusque arterias, ceterum angustissimas, aperire se, ad furculos venarum subnascentes libere capiendos. Nemo sibi facile persuadeat, propterea aperiendas esse, ut, quem afferunt jugiter, sanguinem fundant optimum. Quem enim tum modo effundere, cum vel abortus infelici casu accidat, vel partus, fere consentitur. Neque ullam profecto, sine noxa præsentis ac periculo, guttulam ejicere possunt. Consentaneum ergo naturæ, opinari, quod, infisionis venarum placentæ causâ, actis maxime diametris pateant. Quo circa nec in alia adeo eminent hiantque sede, quam qua placenta adnascitur.

§. X V.

Vena umbilicalis, ex corpore placentæ oriunda (§. XIV.), brevi & fere recta in funiculum descendit (§. XI.). Una esse, quæ, ni semper, frequentissime tamen, occurrat, vere statuitur. Ex centro strati vasculosi (§. IX.) subtus procedit, ita ut mox infra chorion interque amnion erumpat. Inde statim fibrosam meabilem funiculi adit substantiam (§. VIII.), eamque ad foramen usque umbilici perambulat. In quo decursu, magis minusve tortuoso, binas, sibi adversum euntes, arterias umbilicales semper comitatur. Inter
C
quas

quas vel media prope, vel oppositum versus latus ducta, definitam suam pergit viam. Ubi primum placentam deserit, capacior paullo, quam in progressu deorsum, reperiri solet: Plerumque ibi, si vel aere, vel alia materie extenta sit, pennam anserinam majorem æquat. Eamque paullo minorem inferius, in quaque sui sectione, cylindrici instar canalisi æquali, facile capit. Hinc mollitie non solum ac tenuitate, sed magnitudine etiam adspectabili, ab arteriis fociis discerni potest. Quarum enim juncta quoque lumina tam longe superat, ut tria quatuorve emetiatur. Vena isthæc, peragrato funiculo, se continuo in umbilicum mergit, ubi exiguo intervallo a peritonæo distat. Ad quod cum extus devenit, flexo cursu retrorsum & sursum, per regionem umbilicalem ad mediam Epigastricam tendit. Hic exporrectum in abdomen ligamentum offendit, suspensorium hepatis dictum. Cujus ima parte longiori excepta, deorsum paullo in patentem sibi fissuram, vel sinum, ejus fertur. Intra quem suspensa altiori sensim gradu adscendit, quo sinistrum principem venæ portarum ramum adipiscatur. Atque tandem in eum, vel simplex, vel divisa, & portione hepatis succrescente, ceu ponticulo quodam, recta, ad angulum fere rectum exit. Adspectu cognoscitur, ita plerumque exire, ut, paullo ante finem amplior, ementiori ramo illi continuata dici queat.

§. X V I.

Hepar grande foetus, præter venam umbilicalem (§. XV.), ductum, vel canalem, quem vocant, venosum peculiarem obtinet. Qui fere e regione ejus
exi.

exitus, quo paullulum modo dexterior est, superius a ramo sinistro venæ portarum editur. Principio oblique parum surgit dextrorsum, ubi mox lobuli sic dicti Spigeliani caput attingit. Tum porro secundum longitudinem ejus latusque sinistrum, rectius utcumque sursum meat, ita ut a venæ umbilicalis directione parum deflectat. Denique ad supremam hepatis oram, quodammodo excisam, ultra lobulum perducta venæ cavæ inferiori, eo circumfusæ, sub diaphragmate inferitur. Eaque, qua incedit, parte posteriori impressum quodammodo hepatis sinum tenet, in quo receptus commodissime sedet. Præter hoc, posteriori superficiei inducta, membrana ejus tenuissima includi, anteriori-que substantiæ hepaticæ, subtili valde & stricta cellulosa, illigari solet. Venosi canalis nomine recte appellatur. Namque ex textura membranacea adeo tenui ac molli fit, ut, nisi repletus, in se concidat. Ejusmodi vacuus cum nec sustineat se, nec lucem reflectat, vix ægre in sensus incurrit. Verum, infuso lacte, vel alio liquore tincto, perlucidus colorem spargit, quo pulcerrime enitet. Plenusque dum tumet extrorsum, capacitatem præfert notabilem, qua haud longe venæ portarum cedat.

§. X V I I.

Commemorabilis valde in foetus corde exstat meatus, quem Oeconomiae ejus naturalis dudum reddit celebrem. Anatomici foramen vocitant ovale a figura, quam præbeat, ovo simili. Apparet egregie, resecta aure cordis dextri, ceu fossula quædam, in sinus utriusque venosi intergerino pariete sita. A cujus ima &

postica parte, venæ pulmonali dextræ inferiorique cavæ confini, superam internamque mediam versus se porrigit. Ovato fere ambitu terminata est, cujus superior ora, ab extremo pariete ad cordis basin extensa, ultra dimidiam crassitie sua prominet. Inferior autem, tenuis admodum & lævis, a facie membranacea interiori vix ægre distingui potest. Ea, inclinata parum & sursum utrimque flexa, in oppositam sibi curvam evadit. Pelliculam intus propagat subtilem, pelucidam, mollem & albicantem. Hæc internæ sinus utriusque membranæ continuata est, eaque arctissime invicem, & cum fibris intercedentibus tenerrimis, concreta, enascitur. Integra & firma majorem, quam occupat, fossulæ partem perfecte ocludit. Surgitque altius retro oram superiorem, laxa & mobilis, ita ut meatum subrotundum constituat. Quem cum pro re nata claudere & aperire possit, valvulæ nomen & officium obtinet. Cui, si recens consideretur, quam eximie accommodata sit, manifesto liquet. Siccata vero, qualem pleræque Anatomicorum icones exhibent, contrahi adeo imminuique solet, ut majorem minoremve hiatus efficiat. Angustior longe meatus, ubi assidet valvula, ostiolum modo oblongum relinquit. Atque apertus demum, semota illa, liberrimum e sinu dextro ad sinistrum parat aditum. Is enim, cum bene patet, parum abest, quin digiti minimi apicem capiat.

§. XVIII.

Inter vasa insigniora, quæ foetus humani propria sunt, canalis dictus arteriosus annumerandus est (§. VI.).
Qui

Qui, si minus firmitate ac robore, usu tamen quem præstat, nomen suum tuetur. Canalis ille membrana-
ceus est, laxus mollis, venosi fere ad instar, tener &
æquabilis. Ab arteria oritur pulmonali, cujus trunci
continuati speciem gerit. Ex eoque brevi, de basi cor-
dis dextræ surgente supra ostium arteriosum extuberat.
Inde ab origine sua aortæ adjacet, quæ inferius paullo
ac posterius e corde sinistro provenit. Primumque ut
egressa est, auriculam dextram inter & arteriam pulmo-
nalem media, obliquo parum ductu antrorsum adscen-
dit. Tum porro, eo mutato, dextrorsum se vertit ac
antrorsum, ita ut levem curvam describat. Qua por-
recta deinde longius sinistrorsum sursumque contendit,
quo sinistrum bronchum superascendere queat. Hoc su-
perato tandem, exiguo flexu deorsum ad dorsi spinam
abit. Canalis arteriosus, quam editam mox attingit,
aortam, ad finem usque curvaturæ, ubi desinit, co-
mitatur. Nimirum ibi dum adrepit, concavam ejus
& infernam lambit faciem, adscensu gradatim incurvat
se posteriora versus supremoque descendit. Subjecta
proxime, cellulosa tenuioris beneficio, adhæret aor-
tæ, cui, accommodate facto arcu, ab anteriori paul-
lo infra subclaviam sinistram innascitur. Intrat supra
ad angulum valde acutum &, reflexis membranis, pa-
tulo ore intus exit. Arteria pulmonalis, propagato
isto canali, minor directum ad pulmones iter conti-
nuat.

§. XIX.

Peculiaris vitæ ratio, qua foetus tenellus utitur, in
partium recensitarum functiones potissimum redundat

(§. VI.). Hæ, ut variæ sint, universæ tamen ad definitum humorum cursum provehendum moderandumque pertinent. Et primum hoc, quod amplissimum est, munus arteriæ umbilicales auspicantur. Quæ alatum sibi jugiter & rapide sanguinem ex proximis iliacarum truncis hauriunt (§. VII.). Nullum subit dubium, quin haustum alacriter per funiculum umbilicalem ad placentam uterinam deferant (§. VIII.). Eamque deferre se omnem, simplici, ni fallor, decursu suo, nec ramoso, plane comprobant. Quin multum etiam copiosumque, valetudine integra manente, ex corpore foetus illuc advehant, necesse est. Namque certe tanto plus recipiunt fluidi; quanta majori capacitate præditæ sunt, qua iliacas externas longe exsuperant. Quocirca & maximam ejus, superiores per arterias appulsi, portionem in se convertunt, minima tantum inferioribus relicta artubus. Ad hæc, quæ amplitudini suæ ac firmitati respondet, vi motrice eximia pollent. Equidem ab aërta valida ac propinqua, quæ imum ventrem incolit, continuatam sibi substantiam trahunt membranaceam. Cujus autem vel nihil, vel perparum, quamdiu funiculum permeant umbilicalem, fortasse deperdant. Continenti hinc, quem præstant, motu fortique adactum velociter sanguinem uberrimum sine mora propellunt. Perguntque semper & minimis accipere, & propellere momentis, donec emeritæ quasi agere cessent. Non facile credendum, ita ibi constitutas esse, ut crassiores modo, vel fæculentiorem, nanciscantur. Etenim eo, quod a latere descendunt & retrogradæ sunt, ad separandum ullam dare posse ansam, haud videntur. Massa sanguinea enim, quam longe arteriarum truncos ramosque patentiores permanat,

nat, non aliam, nisi fluminis rapidi, in rivulos divisionem subit. Tota heterogenea & probe commista, æquabili impulsu & pressu a tergo, in quovis canalium puncto, volvitur. Pars itaque ejus, quæcumque sit, five linea recta, five curva quadam, feratur, immutatam massæ integræ indolem servat. Similemque inesse sanguini, quem ex abdominali arterioso abripiunt arteriæ umbilicales, annuere oportet. Natura humana ad movendos humores suos vires adhibet, quæ, vitales scilicet, leges hydraulicas generales vehementer eludunt.

§. X X.

Arteriæ binæ umbilicales, descripta via, sanguinem defoecatissimum (§. XIX.) ad placentam pervehunt (§. IX.). Eo, quo propagant se, ordine illatum fluidum per ramos suos continuo distribuunt. Certumque est & extra controversiam, tam largiter distribuere, ut omnes, licet innumerabiles, a maximis ad minimos usque, perfundant. Namque non minus gnaviter, ac cor foetus actuosissimum & aorta, vices suas obeunt. Ita utique natæ sunt, ut, quo ad vigent, in alterna diastole & systole versentur. Nec durior, cui inhærent, funiculi substantia (§. VIII.), nec laxa mobilitas, impedit, quò minus utramque motus vividissimi speciem libere edant. Et revera ibi more suo valide pulsare, in dubio foetus viventis indicio, quandoque observantur. Intelligas hinc luculenter, perennante circulatione, ingentem esse sanguinis copiam, quam placentæ adferant. Næ huic, verbo,

bo, eam demum per vices ingerunt omnem, quæ universo foetus corpore continetur. Ut vero inde diviso affluit agmine, totam paulatim & replet, & percurrit, placentam. Cujus nempe arteriæ, umbilicalium propages, appulsum a tergo sanguinem per ramos suos confestim diffundunt. Pari operam dant solertia, quam vita inspirat, ut principem hujus humorem æquabilissime trajiciant. Quid? quod etiam trajiciunt expedite adeo feliciterque, ejus ut nihil unquam in ulla serie remorentur. Majores incitant ad agendum minores, quique minutissimis ultimisque mirabili quasi concentu præludunt. Ea actuositate sola fit, ut sanguis, ceterum crassus & iners, fabricam placentæ arteriosam per subtilem & creberrimis impeditam plexibus, commodè permetiri queat. Ex angustissimis ejus finibus continentur pulsus, maximam partem incontinuum manat venosam (§.XIV.). Cujus enim principia, velut oscula sunt innumera, quæ ipsi perlamenti apposite patent. Pauciora modo minusque expedita offert superficies interna uteri, qua junctam sibi tenet placentam. E cujus dorso quæ porrigunt se, arteriolæ interiores omnes subtilitate superant. Neque communi continuationis perfectæ via æquam venarum conjunctionem perveniunt. Nondum plane, quod sciam, constat, quo modo earum foraminibus immissæ coalescant. Videntur tamen, quod ratio edoceat, sic coalescere, ut apertæ, quem vehunt, humorem ibi transfundant. Sanguis jam, in placentæ venas perlatus, ex minoribus sensim in minores decurrit, ex quibus demum confluens unam umbilicalem ingreditur. Quo in transitu, imminutus ante paulum, tempestiva accessione fluidi, quod uterinæ reddant arteriæ (§.XIV.), plu-

plurimum augetur. Ea hinc a placenta remanet copia, qua convenit foetui ex debito ut restituatur.

§. X X I.

Vena umbilicalis, refluente a placenta, sanguinem (§. XX.) ad hepar foetus, perinde ac cava ad cor, perducit. Non opus erit, hoc, arbitror, multis ostendere, quod reapse eo directo gradu, qui naturalis sit ac perennis, necessario ducat. Solemni omnino notissimoque canalis venosi, & viscere abeuntis, officio fungitur. Liquet etiam, notatum attendenti exitum (§. XV.), venæ portarum sinistrum esse ramum, in quem proxime sanguinem derivat. Cujus partem longe maximam, ni omnem, infundere se, patente præsertim ostio probat. Minutulis enim aliquot, quos intransitu sinus hepatis utrimque interdum det, ramis perparum modo impertiri potest. Molle & amplum vas cavo suo egregie pervio vitalem humorem commode deportat. Necessarium ei motum continua tam cordis, quam arteriarum maxime umbilicalium foetus actio parit. Hæc, qua in fano emicat, tam longe producit vim suam, ut in systema placentæ vasculosum extendat. Ex quo non interrupta serie venæ communicat umbilicali. Quæ proinde sanguinem, cito placidoque flumine currentem, facile transmittit. Et licet tortuosa funiculum perrepat, eum tamen ullo in puncto multum retardare nequit. Irruens fluidum, quod pluribus ex rivulis crescit, congesta mole velocius provolvi solet. Concitat enim in se quasi vires motrices, eisque intentis, majorem impressionem sustinet.

D

Vena

Vena umbilicalis, a quamplurimis minorum myriadibus, inter se in unam conjunctis, conflatur. Ex quibus omnibus, quovis fere momento, confluentem colligit sanguinem cumulatque, adeo ut quantitate auctum velociter quoque ad hepar deferat. Quantitatem istam, qua rite impleatur, haud exiguam esse, conspicua valde capacitate sua prodit. In foetu ipsa vena portarum multo semper major reperitur. Atque tum fluenti sui copia, tum in cursu excitatori, ramum ejus, in quem se aperit, dextro aliove oppido efficit extensioem. Membranaceus ille, pro tenuitate & mollitie sua, non potest, quin incurrentibus in se undis cedendo ampliorem cavitatem consequatur. Unde vulgo eum appellant sinum, addito nomine Glissonii.

§. XXII.

Magna vis sanguinis, quæ per venam umbilicalem ad hepar manat (§. XXI.), in canalem præsertim venosum (§. XVI.) adscendit. Hic ad eam admittendam & pulcre natus, & opportuno loco situs, est. Etenim eximia eminet capacitate, qua magnam potius venam, quæ cum cava inferiori se jungat, quam ramum quendam æmuletur. Laxus insuper & dilatari aptus humori, ubertim influenti, facillimum concedit ingressum. Neque solum amplitudine sed positu etiam & ductu rectiori a principio ad finem concedit. Etenim patentiori, quo incipit, ostio, oppositum sibi e diametro fere, venæ umbilicalis cavum spectat. Eoque semper aperto, sanguini celeriter illabenti,
adi-

aditum præbeat expeditissimum, necesse est. Is pro-
fecto, quo minus cogitur a rectilineo cursu divertere,
eo æquabiliori fluit incitatorique. Hinc dubio procul
& parte sui haud exigua in canalem venosum ruere
debet. Mutata vero directione etiam, vel sinistror-
sum, vel dextrorsum, in patulos venæ portarum ra-
mos discedere, ita ut totum hepar percurrat. In quo
tunc venoso pauciori, qui regia e visceribus abdomi-
nalibus remeat via, opportunissime miscetur. Abdo-
minalis ille contra, variato impulsu, cum altero con-
fundi, & quadam parte, majori minorive, in cana-
lem abripi venosum posse cognoscitur. Cui proinde,
pro re nata contingit, vel umbilicalem solum, vel he-
patico remissum excipere. Omnemque, quovis modo
exceptum, nec imminutum quidquam, in venam ca-
vam inferiorem confert. Ei subtus insertus, quo
aptius evacuet se, circulari ore bene diducto desinit.
Totus cum brevis sit, ceteroqui iners, velocitatem
fluidi accurrentis nihil moratur.

§. X X I I I.

Sanguis, ex placenta & foetus abdomine redux
(§. XX—XXI.), per venam cavam inferiorem ad cor
dextrum fertur. In cujus receptaculum, quod dicunt
venosum, una cum eo, quem superior cava a vicinis
advehit partibus, influit. Uterque ibi commistus mo-
mento citius in duos scinditur rivos, qui inæquales
continuo diffluunt. Alter per foramen ovale sinum
cordis sinistri, & dextri ventriculum alter, petit. Prior
oppido exilior esse, e minori foraminis, quam ostii ve-
nosi

nosi, diametro, colligi potest. A copioso præsertim sanguine oritur, qui ex cava inferiori sursum prorumpit. Is objectum sibi in adscensu foramen invenit ovale (§. XVII.), vel meatum, eumque subit commodissime. Namque inde mollem & obsequiosam, quæ inferiori ex limbo retro superiorem surgit seque recondit, valvulam facile submovet. Hæc superne prominente intus ab auricula sinu, velut colliculo, præmunitur, qui, quem superior cava demittit, sanguinem avertit & orificium versus dirigit venosum. Nihil vero obstat, ne inferioris cavi columna obvio foramini inferatur. Contra, velut certo limite posito, facit, ut absque ullo errore ingredi queat. Quin satis etiam rapide advolvitur, ut tenuem parumque acclivem intret meatum & superet. Tempestive pariter ac expedite ibidem intrat, quandoquidem ad cor, in diastole constitutum, appellitur. Laxus scilicet tunc & vacuus uterque; ex lege synchronismi, sinus fluido irruenti libere patet. Explicato simul molliter pariete intergerino, patulum se exhibet foramen ovale accommodatque. Meabile itaque hoc sanguinem allatum e sinu dextro in sinistrum jam ilico finit perlabi. E contrario transitu ex posteriori in anteriorem, valvula ei præfixa prohibet. Siquæ pro laxitate sua non potest prohibere omnem, urgenti tamen maxime cedere debet. Quocirca necessario semper cedere ei, quem sinus dexter elargitur. Is enim majori certe & copia irrumpit & impetu, quam qui e venis pulmonalibus in sinistrum defluit. Ille nempe solus est, qui ex longis pulmonum consistentium angustis singulari lenitate paucus redit. Etenim parce iis infusus non minimam sui partem in nutritionis se-
 cre-

cretionisque usus ultro erogat. Eoque lentius serpit, quo, deficiente respiratione, ad acriter procurrendum minus incitatur. Propterea nec sinum sinistrum adeo replet, quin capacior hic e dextro injectum humorem diducto veluti ore hauriat. Num autem quid ejus, quod forte redundet, remittere queat, non opus videtur amplius disquiri. Oportet, quod quisque largiatur, ne vitalis in principe corporis viscere turbetur motus, nihil certe remittat. Naturæ ei prospexit ordinato tam sapienter valvulæ janitricis situ, ut regressus, vel refluxus, vix ac ne vix quidem contingere possit.

§. XXIV.

Major sanguinis pars, ab ingressu foraminis ovalis exclusa (§. XXIII.), cordis dextri ventriculo proprie destinata est. In quem, diastolen insequente. receptaculi venosi systole, per ostium patentissimum, protinus conjicitur. Eo repletus ille, ad certum distensionis gradum, momento post, contractionem obit, qua gravem sibi humorem actutum expellat. Atque omnem, quem complectitur, mirifico fibrarum nisu in arteriæ pulmonalis truncum ejaculatur. Uno eodemque temporis puncto, eum etiam canali arterioso (§. XVIII.) directe immittit. Qui enim, nascenti trunco proxime continuatus, se apte simul replendum offert. Præcipua sanguinis, ibi impulsæ, pars est, quam sibi dicatam capeffit & absorbet. Namque principio ubi oritur, parum abest, quin ipsius arteriæ pulmonalis magnitudinem assequatur. Primigeniis autem ejus ramis,

posterioribus, tum dextro, tum sinistro, quam multo capacior esse, cernitur. Quocirca humoris quoque, quam ad pulmones permanet, majorem haurit copiam & abducit. Nulli, ut reor, nisi huic moli, ceu potentiae agenti,tribuendum, quod in tantam amplitudinem excrefcere soleat. Eidem trajiciendae tota cavi sui forma, vel extensione, exactissime semper convenit. Utrum vero sanguinem ex arteria pulmonali in aortam, an contra, ducat, acriter & ingeniose disputatum fuit. Sed, curate paullo examinatus, credere suadeat, quod ex priori in posteriorem arteriam derivet. Nam flexusne canalis ita incedit, ut inferius aortae descendentis ad angulum acutissimum infigatur? E corde dextro ejectum, quod rapit, fluidum in eam declivi ductu suo facile demittat. Plenus eo & semper eodem ex fonte hausto, nescit, illud contrario motu referre. Quin contractio etiam determinata tam fortiter pellit contentum, ut, quidquid forte occurrat, e vestigio repulset. Quodsi praeterea statueretur, ex aorta pulmonalis truncum versus adducere; quaeri posset, quorsum tandem ageret? An ad cor dextrum, an pulmones? Primi, qui hos adeunt, rami adeo exigui sunt, ut, praeterlabente canalem arteriosum, humore satis possint perfundi, nec ullo ex aorta comaeatu indigeant. Neque hoc quidem cor illud indiget, valvulaeque impediunt semilunares, ostio ejus arterioso praepositae, ne quid in ventriculum refundatur. Sanguis demum cordis sinistri, per foramen ovale & venas pulmonales allatus, tanto in aortam ruit impetu, ut, nisi injecto obstaculo, sursum inde recedere queat.

§. X X V.

Singularis motus sanguinis in (§. XIX.—XXIV.) quem foetus tam extra quam intra corpus suum producit naturali ejus oeconomiae mirifice respondet. Hæc, si generatim spectetur, simpliciore longe, quam communis alia hominis nati, speciem præbet. Tota equidem in eo versatur, ut pusillus modo & vivat commode, & crescat. Vitalis vere vita est, qua in molli & calido uteri sinu, ab externis procul injuriis, fruitur. Sanus ibi & vegetus eam propria semper partium actuositate (§. IV.), colit. Ad quam probe alendam, nutritionem sui perfectam, cum felici conjunctam incremento complectitur. Unde nam autem quaeso aptam huic usui necessariamque petat materiem? Non potest, arbitror, ullam, nisi ex proxima petere sede, seu utero materno. Cujus hinc nexum sibi convenientissimum cita absolutaque parat placentæ generatione. Natura, formatrix optima operosissimæ ejus fabricationi arterias foetus adhibet umbilicales. Ex quibus sparsis creberrime ramis continuatisque systema vasculosum stupendo artificio contexit (§. XII.). Idque ipsum tam affabre cum uterino conglutinat, ut commercium omnino liberum intercedat. Aperta enim ibi vascula sunt, quæ communicare inter se, vix dubitandum est (§. XIV.). Quo circa, quæ communicent, arterias placentæ humorem propinare venis uteri, hujusque arterias suum reddere venis placentæ. Neque unquam reddere pari, sed multo uberiori, quam accipiant, copia. Quidni patentibus, perfecto nexu, sanguinem tradere omnem, quem femella alias quovis men-

menſe fundere ſolet. Eamque majori cum parte affluentis ex foetu commiſceri adeo, ut inde in ſubtili placentæ contextu unum homogeneous fluidum evadat. Multiplex ergo & præſtabilis valde uſus ejus elucet, qui certe in vitam & nutritionem foetus univerſam redundat. Quibus perſpectis, liquet puto clare, qui ille poſt graves matris hæmorrhagias reddi poſſit fere exſanguis? Cur nimium ſanguinis ejus profluvium plerumque abortum ſequatur?

§. . . X X V. I.

Sanguis placentæ venoſus omnis rapido & perrenni curſu ad foetum redit. Aptiſſimum, quo reducatur, vas vena præbet umbilicalis, quæ eum ad maximum abdominis viſcus vaſculoſiſſimumque, hepar optime defert (§. XXI.). Ne hoc, licet grande fit, copia obrueretur, canalis adest venoſus (§. XVI.), qui ejus partem haud exigua hauriat, venæque cavæ tradat inferiori (§. XXII.). Hæc, communis & ultima abdominalis, humori, quo affluit, abunde recipiendo & dextro ingerendo cordi egregie inſervit (§. XXIII.). Sed allatus ibi loco foret difficili, niſi viæ eſſent peculiare paratæ, quas permeare poſſet, foramen ſcilicet ovale (§. XXIII.) & canalis arterioſus (§. XXIV.). Foetus enim, liquori amnios innatans, & ovo uſque quaque clauſo contentus, aerem captare nequit. Quo ſibi deficiente, pariter ac homo, aqua alte demerſo, a reſpiratione omni vacat. Hinc immoto incluſos thoraci pulmones habet, denſos, compactos, minusque ſolito meabiles. Ejusmodi anguſtioribus tantum inſtructi

structi vasis parum admittere sanguinis transmittereque
queunt. Ejus vero ingens jugiter accedit moles, in
corporis universi usus ad aortam provehenda. Isthæc
omnis in nato per pulmones, ducto naturaliter spiritu
bene explicatos, proxime transit. Ne igitur ibi mo-
lesta cordi & exitiosa hæreret, foramen ovale & ca-
nalem subit arteriosum quorum breviori rectiorique
ductu in aortam evolvitur.

§. XXV I I.

In sano foetus corpore sanguis per cor & utriusque
generis vasa continenti motu circumfertur. Qui uni-
versalis, quem circularem vocant, a viribus ei inna-
tis, vitalibus, proxime pendet. Hæ suo agentes mo-
dulo, incitatione tam mirabili, quam amica præclaram
sibi invicem operam navant. Exercentque se ita, ut
tenerrima, quibus insunt, organa ad principii sui actuosi
rationem agitent. Quam ubique sequendo præfertim,
si valent, ab affinibus sibi, quibus foecundus gaudet
uterus, vehementer abludunt. Incolumes etiam sæpe,
afflicta matre, eaque extincta, aliquamdiu quandoque
manent superstites. Comparatæ sic quam pulcerrimæ
sunt, ad naturales partium, singulari tenuitate ac mol-
litie præditarum, motus rite moderandos. Quos ita-
que dum præstant, in corpore foetus massam sangui-
neam impigre circumagunt. Verum enim non eam
solum pellunt æquabiliter, sed conficiunt quoque &
assimilant. Observatum esse scitur, ovum recens foe-
cundatum in quovis puncto visibili albicare. Vivipa-
ris quod innascitur punctum purpureum saliens dictum,
E jam

jam paucis a prægnatione diebus apparere. Atque in humanis embryonibus minimis, nec dum mensis ætulam nactis, nitidam effulgere rubedinem. Quæ cum magis minusve diffusa sit, non videtur, nisi a tantillo sanguine posse proficisci. Sed primo tempore mobilis embryo tenuem saltem lympham limpidamque angustissimis vasculorum umbilicalium osculis sorbet. Neque uterus statim atque suscipit placentam, porrectis inde canaliculis subtilibus sanguinis quid instillat. Non credibile est, quod prius instillet, quam arterias suas, plane apertas venis ejus commiserit (§. XIV.). Adultior tunc foetus vitalem oeconomiam perfectiorem, magno cum vigore sustinet. Verosimile hinc fit, quod ineunte prima ætate (§. III.), solus sibi proprium gignat sanguinem, & post maternum, suo mistum assimilatumque contineat. Eum autem omnem, ex quo paret, humorem videtur e venis umbilicalibus, ceu proximo largifluoque fonte haurire. Num quid enim recte statuendum, quod ex amnio ore immobili, vicido & quandoque clauso bibere queat? An bibere continuo liquorem sibi circumfusum, nec ventrem implere nimium? An sine ventriculi redundatione, vel primarum viarum ex auctis fordibus noxa? Quarum certe parum, secundum naturam in iis, nomine meconii, inveniri solet. Quodque e fluidis, ibi confluentibus, & præsertim bile crassiori cystica facile generari queat. Foetus ceterum sani ventriculo tantum gelatinæ, vel mucii speciem inesse, similem fere ei, quæ asperæ inhæret arteriæ, constat.

§. XXVIII.

Foetus sanguinem, quo affluit, ad oeconomiae suae usus quaquaversum distribuit. Ex flumine ejus vitali primum sumit materiem, qua corpus suum abunde nutriat. Quod quo tenerius est actuosiusque; eo felicius inde ad eximiam magnitudinem brevi crescit (§. IV.). Superiores autem partes mediasque, quam inferiores citius progenerat & perficit. Quibus enim plurimum omnino subtrahit humoris arteriisque umbilicalibus impertitur. Totum ita ut capit incrementum, ex eodem fluido necessaria sibi complura, tum tenuiora, tum crassiora, secernit. Quorum plurima, apprimè utilia, tam intra quam extra se a cursu peculiari ad communem, unde fluxerant, fontem revocat. Pauciora modo, eaque vel superflua, vel aliter inepta, in organa, quæ vulgo vocant excretoria, mandat. Inter hæc bina maxime notari merentur, intestina scilicet & vesica urinaria. Intestina excrementorum quid, quod in mucō abundantiori & meconio consistit (§. XXVII.), paullatim colligunt. Sed paucum id est, quod cruda non ingerantur alimenta, ex quibus multum ejus generetur. Neque molestum adeo accidit foetui, ut necessum sit, gestationis tempore alvum dejiciat. Quam ceteroqui, respirationis destitutus auxilio, deponere nequit. Nihil etiam, quod sentiat, incommodi, ab urina nanciscitur. Quæ enim nec copiosa valde, nec acris, ut stimulet fortiter, a molliculis renibus segregatur. Blandus sanguis, nec largo dilutus potu, nulla re minus, quam aqua; vel lymphæ falsa abundat. Totus ex principiis, quæ chemici ap-

pellant, apte permistis temperatisque constat. Præter hæc parca ad systema uropoieticum affluit copia minimamque tantum partem secretioni subministrat. Plurimus, quem aorta descendens devolvit, in arterias rapitur umbilicales. Cum ergo pauca sit, quæ vesicam petat urina conceptaculum ibi invenit satis capax, quo colligatur. Quid collecta pariter ac foex alvina intus remaneat, donec partus edatur.

§. X X I X.

Ea demum esse foetus oeconomia, ut vitæ corporis & nutritioni maxime serviat, plane perspicitur. Universa itaque functiones tantum præcipuas, quas vitales naturalesque proprie vocantur, complecti solet. Animales sic dictas, quæ in hominem perfectum cadunt, vix ac ne vix quidem colere videtur. Foetus enim, nescius certe sui & rerum, quæ intra & extra se geruntur, in utero veluti alta mersus caligine latet. Nulla equidem perceptio vel sensatio est, qua ibi affectum se fuisse, natus unquam dicere queat. Non dubitare licet, quin aëre communi æque ac luce careat. Vivit ergo sibi, & perinde quasi, ac si organis sensoriiis haud instructus esset. Neque his, ut pote officio nondum aptis suo, excepto tactu, uti posset. Iis veluti præclusis, sensus externi omnino sibi defunt, & internus etiam, qui in homine nerveo residet interiori, ut plurimum filet. Alimenta, quæ tenellæ proli necessaria sunt, ex matris visceribus tacite quasi affluunt, ita ut tranquilla satietate fruatur. Reliqua naturæ organa quam placidissime agunt omnia.

Qui-

Quibus consideratis , fortasse credas , foetum ætatem suam tanquam in somno transigere , nec prius plane expergisci , quam lucem ingrediatur.

F I N I S.



C O R O L L A R I A.

I.

*Vis vitalis, quæ foetus matrisque corpori inest,
natura non differt.*

II.

*Respiratio ad vitam non essentialiter, sed, ut
dicunt, per accidens modo necessaria est.*

III.

*Aer externus, qui inspiratur, temperando san-
guinis pulmonalis calori inservire potest.*

IV.

*Foetus in utero detentus calorem commode fert,
nato cuique intolerabilem.*

V.

Vasa lactea in foetu lymphaticorum vices præstant.

V I.

Anima corporis sui formatrix esse, recte negatur.

V I I.

Eaque utrum ante, an post, conceptionem, & quando, existat, nescitur.

V I I I.

Ætas in pulsu naturali mutando plurimans valet.

